



# महाबुद्ध : छगू अध्ययन

भिक्षु सुदर्शन

प्रकाशक : बहादुर शावय, यल

रवि शाक्य, इखाछै, यल

**महाबुद्ध :**

**छगू अध्ययन**

**भिक्षु सुदर्शन**

**प्रकाशक:**

**बहादुर शाक्य**

**श्री शिवदेव संस्कारित रुद्रवर्ण महाविहार, यल**

प्रकाशकया थःगु ६९ दँ बुदिया उपलक्षय्  
धर्मदान

परिवर्तित परिवर्द्धित निगूगु संस्करण  
प्रति : १०००

ने. सँ. ११०१  
बु. सं. २५२४  
वि. सं. २०३७

## निगू शब्द

“महाबुद्ध : छगू अध्ययन” सफू हानं छको निकोगु अध्ययन कथं पिहाँ वया च्वन । ह्लापांगु अध्ययन श्रद्धालु बहादुर उपासकं थःगु ५८ दँ बुदिबले प्रकाशित याना बिज्याःगु खः । थःगु ६९ दँ बुदिया उपलक्ष्यय् नं “महाबुद्ध : छगू अध्ययन” आः हानं छको पिकाय्गु इच्छा याना बिज्यात । उकिं हे हानं छको अय्क ‘महाबुद्ध’ या अध्ययन याना । थासय् हे च्वना माःसा छचालं चिचाः दना च्वंगु ताम्रपत्र, शिलापत्र व तालपत्र वांलाक अध्ययन याये फुसा “महाबुद्ध”या जक मखु, उगु थाय् वहाःया उगु ई - ब्यःया छगू महत्वपूर्णगु इतिहास हे दइथें ताया ।

सीमित पृष्ठय् अध्ययन वचचायेके माःगुलि थुगु अध्ययनय् महाबुद्धया प्रबन्ध - व्यवस्था, रीतिस्थिति व आर्थिक अवस्थावारे छुँ खँ दुध्याके मफुत । अथे नं “महाबुद्ध” ब्वनेत आधार “महाबोधि” वारे छुँ खँ संक्षिप्तं

थुगु अध्ययनय् दुथ्याकागु दु । अऊ श्रीलंका, थाइलैण्ड,  
वर्मा व चीनया महबोधिया तस्वीर तकं छापे याये दुगु  
जूसा गुलि ज्यू धयार्थें मती वं । ब्लक खर्च व तस्वीर  
प्रिन्ट खर्च यक्व तुइगुलिं थ्व नं सम्भव मजुया वन ।  
उकिं थुगु अध्ययन नं पुमवंति ताया ।

श्री बहादुर उपासकं “महाबुध्द” प्रकाशित यायेगुली  
श्रद्धा तया विज्यात । थथे थःगु त्वाःबाःया सांस्कृतिक  
सम्पदाया महत्व प्रकाशय् ह्येगु ज्या पुणित धर्म कार्य जक  
मखु, तःधंगु राष्ट्रिय कर्तव्य नं खः ।

जिगु प्रार्थना दु, त्रिरत्नानुभावं श्रद्धालु बहादुर  
उपासकया दीर्घायु जुइमाः । हानं जित आशा दु, “महाबुध्द”  
या अध्ययन क्रम नं बुलुं बुलुं कं कं पूर्ण जुइक न्ह्याकावं  
यंके फइ ।

अन्तस प्रूफ स्वयेगु निसें ज्या याना सफू इलय्  
सिधयेका व्यूगुलीं नेपाल सहकारी प्रेस लि० परिवारयात  
जिगु धन्यवाद दु ।

ठंहिटी

- भिक्षु सुदर्शन

३ कछलाथ्व ११०१

## महाबुद्ध

‘महाबुद्ध’ चैत्यादि देगः या देश नेपालय् च्वंगु चैत्य मध्यय् छगः चैत्य खः । तर थ्वया मू ऐतिहासिक व सांस्कृतिक कथं बिचाः यायेत्रले धाःसा मेमेगु तःगः मछि चैत्य व देगः या मू सिबे नं यक्वं अप्वः जुया चवन ।

‘महाबुद्ध’ यात हे अवौद्ध प्रयोगं महाबौद्ध धाइ । थ्वया शुद्ध व पुलांगु ना महाबुद्ध खः । यतालिवि चैत्यय् लिक्क च्वंगु ने.सं. ८०५ या तहाकःगु शिलापत्रय् “श्री ३ महाबुद्ध” धका च्वया तःगु व महाबुद्धया पण्डित खलः य.के. दुगु अभयराज शाक्यया वंशवृक्षय् नं “थ्व वेरसं निसें महाबुद्धया बाहिरिस चोङ्गयात मथ्यात” धका उल्लेख याःबले “महाबुद्ध” हे च्वया तःगु दु । तर अथे नं नेपाःया प्रायः इतिहास सफुती अऊ फीफीसं तकं नं मसिसें थ्व हे अवौद्ध प्रयोगं “महाबौद्ध” धका धायेगु व च्वयेगु याः ।

महाबुद्ध सिद्धार्थ “सम्बोधि” लाना विज्याःगु थाय्  
मगधया उरुवेल जंगलय् दयेका तःगु चैत्य स्वया दयेकूगु  
छगः बूगु चाया कलात्मक भव्य चैत्य खः । थ्व खँ  
वंशावली व इतिहास सफुती च्वया तःगु दु । थौं कन्हि  
बुद्धगयाय् च्वंगु महाबोधि चैत्य व को महाबुद्ध चैत्य  
स्वयेवले उत्थें च्वंगुलि नं थ्व खँय् कलात्मक समानतां सत्य  
सिद्ध जू ।

### बुद्धगयाय् च्वंगु महाबोधि

सिद्धार्थया सम्बोधि – प्राप्त स्थानय् ह्लापांनिसें छुं न  
छुं स्मारक दु । ‘बोधि’ या प्रतीक रूपय् बुद्धप्रतिमा  
निर्माण जुइ न्ह्यो बोधि सिमा, तयागतया चरण चिह्न व  
चैत्य दयेकेगु यात । थ्व “सम्बोधिस्मारक” देवानांप्रिय  
अशोकया पालय् हे प्रसिद्ध जुइ धुंकल ।

देवतापिनि यःह्य प्रियदर्शी अशोक जुजुं मृगादि  
स्थाना अनेनेगु आमोद प्रमोदया यात्रा यायेगु ज्या थःगु  
राज्यभिषेकं क्रिदँ लिपा तोतल । थ्वया थासय् श्रमण  
ब्राह्मणपनि दर्शन यायेगु, वसपोलपिन्त दान बीगु,  
बृद्धपिं विचाः याः वनेगु, (इमित) लुं दन यायेगु,  
ग्रामवासीपिंथय् वना इमित उपदेश बीगु अले धर्म बिषयय्  
विचाः यायेगु ज्यायात । थुनियात “सम्बोधि” या अनु-  
सरण यायेगु धर्म यात्रा यायेगु धका धया तःगु दु । रीस  
डेविडजया धापू कथं अशोकं अनुसरण याःगु “सम्बोधि”  
अष्टाङ्ग मार्गया अनुसरण खः । अले श्री भण्डारकरया

विचाः कथं थुगु ( वर्तमान विभाजन कथं च्य.गुगु )  
 अभिलेखया “सम्बोधि” या अर्थ भगवान् बुद्धं बुद्धत्व प्राप्त  
 याना विज्याःगु ‘महाबोधि’ खः । थुगु अर्थ विचाः याःसा  
 देवतापिनि यद्वा प्रियदर्शी जुजु अशोक थःगु राज्याभिषेक  
 किदं लिपा “सम्बोधि” (महाबोधि) दर्शन यायेत धर्मयात्रा  
 याना विज्यात ।<sup>१</sup> दिग्यावदनया क्रमं विचः याःसा अशोकया  
 ह्तापांगु धर्मयात्रा थःगु राज्याभिषेकं २० दं लिपा लुम्बिनी  
 जूगु खः । लिपातिनि बुद्धगयाय् । अले थ्व अर्थ विचा  
 याःसा प्रियदर्शी अशोकं थःगु राज्याभिषेकं किदं लिपा  
 “सम्बोधि” ज्ञानया दर्शन याना विज्यात । यःगु थ जु,  
 लिपा हे थ जुइमा अशोकया धर्मयात्रा “सम्बोधिस्मारकय्”  
 नं अवश्य जूगु दु, थुगु खँ ।

साँचीया त्वहँया लुखाय् किया तःगु अशोकया  
 बुद्धगया यात्रा दृश्य नं प्रमाणित याः । अशोकद्वारा निर्मित  
 मुख्यगु विहार (चैत्य) शशांकं स्यंका बिल अथवा लिपा  
 लिपायापि जुजुपिसं श्रद्धालुपिसं श्रद्धा हानं हानं दयेकावं  
 वना अशोककाल न सम्बोधि स्मारक महाचैत्य तोपुया  
 वन । ईसवी ४०९ स दर्शनार्थं बुद्धगयाय् थ्यंकः वःह्य  
 चिनिया यात्री फाहियान थन स्वंगू स्मारक वा विहार  
 खंगु खः । अले ईसवी ६३७ स बुद्धगया दर्शन याः वःह्य  
 व्हेनसांगं बोधिवृक्षया पूर्वय् १६० १७० फीट तःजाःगु

---

<sup>१</sup> अशोक के धर्मलेख, जनार्दन भट्ट एम्. ए., काशी १९८०



चैत्य (विहार) या वर्णन याना तःगु दु । व्हेनसांगया  
 धापू कथ थ्व चैत्य (विहार) वाउँगु अपायागु दयेका हानं  
 चूनं पाना तःगु खः । थुगु थासय् धर्मराज अशोक दयेकूगु  
 चोधंगु चैत्य विहार छगू दुगु खः । लिपा लिपा महन्तपिस  
 थःगु खँ देतलायेक थन मेमेगु खँ वयनीगु अभिलेख नं  
 तःगु दया च्वन ।

ईसवी ३३० पाखे समुद्रगुप्तया दरवारय् वःह्य  
 श्रीलंका याह्य मेधवर्मन नं थन बुद्धगयाय् छगू विहार  
 दयेकूगु जुया च्वन । ईसवी १०७० पाखे बर्माया श्रद्धालु  
 पिसं बुद्धगया चैत्यया पूरा जीर्णोद्धार यात ।<sup>1</sup>

भिक्षु धर्मरक्षित थुगु थासय् ११००-१२०० ईसवी  
 हानं छुं जीर्णोद्धार याःगु व सपादलक्षया जुजु अशोक  
 मल्लं थ्व खर्च कुव्यूगु खँय् बरू वांलाक विचाः याये माःगु  
 दु । छायाःसा आचल्लया काय् तातापागु दिशाय् थ्यंक  
 सहनशीलता फैल्य जूह्य अशोक चल्लया अभिलेख प्रकाशय्  
 वये धुंकूगु दु ।

“... देव धर्म्मोयं प्रवर महाजानजायिनः परमो-  
 पाशकसमस्त प्रकृयोपेत महाराज श्री मदशोक चल्ल देवस्य  
 ... काश्मोर पण्डित भदन्त गुचपथी राजगुरुपण्डितमूशल ।  
 पात्र सङ्करदेव पात्रत्रैलोक्य ब्रह्माकारिभिः श्रीमद्राजानं  
 बोधयित्वा भट्टदामोदर । भट्टयदुमशिष्टं राघव महिपूकाल

---

1 A Guide to Buddhagaya, Devapriya Valisinha, India,  
 1950, Page 27 - 33.

प्रहित्य वीहारोयं बुद्ध प्रतिमासहिता कारिता । . . . श्री  
मल्ल ख्वणसेन स्यातीत राज्ये सं ५१ भाद्र दिने २६” ।

उत्तम महायान सम्प्रदायया अनुयायी परमोपाशक  
व्याक्क प्रक्रियां दुग्गःह्य महाराजा श्री अशोक चल्लदेवया  
श्च दान धर्म खः । काश्मीरया पण्डित भदन्त गुचपथी,  
राजगुरु पण्डित मुशल, पात्र (भारादार) शंकरदेव, पात्र  
त्रैलोक्य ब्रह्मापिसं श्री राजा याके बचं कया भट्ट दामोदर  
भट्ट पदुम शिष्ट राघव महिपूकालपित छ्वया बुद्धमूर्ति सहित  
थुगु बिहार दयेके व्युगु खः । श्री लक्ष्मण सेनया राज्य तंगु  
फ़िगु दया भाद्र २६ दिने ।

थुह्य जुजुं बुद्धगयाय् याःगु धर्मकीर्तिया विवरण  
तिब्बती वशावली नं सुरक्षित जुया च्वंगु दु ।<sup>१</sup>

वर्थे हे मेगु छगू अभिलेख दु । थुगु अभिलेखं  
अशोक चल्लयात सपादलक्ष खस प्रदेशया राजाधिराज  
धका प्रमाणित याः । अभिलेख थुकथं खः—

देवधर्मोयं प्रवरमहायानयायीनः परमोपासकस्य  
हेवज्रचरणारविन्दमकरन्द मधुकर — लिखित महीपालजन-

- 
- 1 ‘इपिग्राफिक इण्डिया’ १२ भागया २६ पृष्ठय् प्रकाशित  
जुगु कर्णाली प्रदेशः एक विटो अध्ययन, नेपाल २०२८ स  
पिहाँ वःगु “कर्णाली प्रदेशको ऐतिहासिक रूपरेखा”  
श्री धन बज्र बज्राचार्यया रचनां उद्धृत । पृष्ठ २१
  - 2 कर्णाली लोक संस्कृति, खण्ड १, इतिहास सत्यमोहन  
जोशी, काठमाडौं, २०२८ पृष्ठ ४६ या पाद टिप्पणी ।

केत्यादिनिजनिखिल प्रशस्ति — समलङ्कृत सपादलक्ष शिख-  
 रिखसप्रदेश राजाधिराज श्रीमदशोकचल्ल कनिष्ठ भ्रातृ  
 श्री दशरथनामधेय कुमार पादपद्मोजीवि भाण्डागरिक सत्य  
 व्रत परायणादि निवर्त्तनीय बोधिसत्व चरित्र क्षत्रियकुलदोष  
 श्री सहणपालनामधेयस्य — श्री मल्लक्ष्मणसेन देवपादाना  
 मतीतराज्ये सं ७४ बैशाख वदि १२ गते ।<sup>१</sup>

प्रवर महायान सम्प्रदायया अनुयायी परमोपाशक  
 हेवज्जया पाली रूपी पलेस्वांया धूया भमः थे जाःह्य सारा  
 प्रजापिनि दथुइ श्रेष्ठह्य इत्यादि व्याकक प्रशस्ति छायेप्यह्य  
 सपादलक्ष (सवालाख) पर्वत खस देशया महाराजाधिराज  
 श्री अशोक चल्लया चीधीह्य किजा राजकुमार श्री दशरथया  
 चरण कमलया सेवायाइह्य भंडारी, खःगु खँ ह्लायेगु आदि  
 व्रतह्य जुया बोधिसत्वया चरित्रया अनुसरण याःह्य क्षत्रिय  
 कुलया मतथें जाःह्य श्री सहनपालया थुगु धर्मदान खः ।  
 श्री लक्ष्मणसेन देवया राज्य तंगु न्हेप्यदँ (७४) या बैशाख  
 कृष्ण द्वादशी बृहस्पतिवार स ।

थुपि घटना १२५५ ईसवी व १२७५ ईसवी पाखे  
 या खः थुकथं सिजा अथवा दुल्लुई च्वंगु राजधानी  
 कर्णालीया खस देश खसानया जुजुं बुद्धगयाय् अभिलेख  
 तयेगु धात्थें हे महत्वपूर्णगु खँ व थुपि जुजुपि महायानी

---

१ इपिग्राफिक इण्डिया १२ भागया ३० पृष्ठ, प्रकाशित जूगु  
 श्री धन बज्र बज्राचार्यया रचना कर्णाली प्रदेशको  
 ऐतिहासिक रूपरेखां उद्धृत ।

बौद्ध सम्प्रदायया पक्कापि अनुयायी जुया च्वंगु अरु थुमि गुरू व भारदारपि समेत बौद्ध जूगु खँ धात्थें हे लुमके वहःजू । थुकि हे थुपि जुजुपिसं थः मनू छ्वया यक्व धन खचं याना बुद्धगयाय् बुद्धमूर्ति सहित विहार दयेके विल । थ्व धात्थें गौरवया खँ खः । थुकि याना छखें थथे दयेकीगु मूर्ति व विहारय् हिमालो कलाया छाप अथे हे च्वनीगु खँ न लुमके वह जू ।<sup>१</sup> लिसें “देव धर्मोप प्रवर महायान-यायिन” धयागु प्रशस्ति काठमाडौं उपत्यकाय् नं ने. स. या लिसे लिसें धयायें वगु शताब्दी तकं प्रचलन जूगु खने दु ।<sup>२</sup>

बुद्धगया ईसवी १२६८ स नं बर्मा पाखें जोर्णोद्वार याःगु उल्लेख जुया च्वंगु दु । वयां लिपा मुस्लोम आक्रमण जुइ धुंका निसें गोसाईं घमण्डी गिर धयाहा प्रयम महत्त वया बुद्धगयाय् ईसवी १५६० पाखे आधिपत्य स्थापित याःबले तकया बुद्धगयाया इतिहास अस्पष्ट धका धाइ । तर थ्व खँ तःसकं बिचारनीय जू । छाया धाःसा थ्व अस्पष्ट ऐतिहासिक अवस्थाय् अभयराज शाक्यं महाबोधि यात्रा यात । महाबोधि स्यनावं वना च्वंगु खना महाबुद्ध संरक्षणया निति दयेकेगु याःगु जुइ । अथवा महाबोधि

---

१ कर्णाली लोक संस्कृति, खण्ड १ (इतिहास), सत्यमोहन जोशी, काठमाडौं २०२८ पृष्ठ ४६

२ स्वया दिसँ:- Medieval Nepal, Hema Raj Shakya, T. R. Vaidya, Kath. 1970.

स्येने दुने न्ह्यो हे अभयराज शाक्य थन विज्यात जुइ । मुस्लीम सम्राट वयां लिपा महन्तयेत मस्तिपुर व तारादिह धयागु गां नं बिल । १८११ ईसवी बर्माया जुजुं बुध्दगयाया यात्रा यात । वयां लिपा अवा (Ava) या जुजुं निह्वा दूत छवया हया बुध्दगया व थ्वया लिक्क लिक्कया थाय्त ह्यसीके बिल । छह्वा महायानी नेपाली भिक्षु थन बल । वसपोल यक्व हे थन महन्तया विहारय् च्वन । हानं छह्वा सन्यासीयात बुध्द धर्मय् दिक्षित याना बिज्यात । थुकथं १५६० ईसवी “लिपानं नेपाली भिक्षुपि बुध्दगयाय् वःगु खने दत ।<sup>1</sup>

१८१२ ईसवी डा. बुचनन् हैमिल्टन (Dr. Buchanan Hamilton) थें जाःह्वा पुरातत्वविद् बुध्दगयाय् बल । वं विहार (चैत्य) पूर्णतः भग्नावशेष जुया च्वंगु खन । हानं महन्तं महाबोधि चैत्य पाखे भतिचा हे ध्यान मतः । थ्वयां लिपा १८३३ ईसवी बर्मी राजदूत मेंगी महा चेसु (Mengy Maha Chesu) थन बल । १८७४ ईसवी बर्माया जुजुं बोधिवृक्षय् छायेत उपहार सहित भारत सरकारयाथाय् राजदूत छवया हल । परिभाग चैत्यया निर्माण यात । १८ अगस्त १८७५ ईसवी गभर्नर जेनरलयाथाय् बर्माया परराष्ट्र मन्त्री महाबोधि सिमाया लिक्क च्वंगु ‘महायान’ (स्मारक चैत्य ?), धर्माशोक जुजुं दयेकूगु अपराजित

---

1 A History of Buddhagaya, Devapriya Valisinha, India 1950, Page 37.

आशनया पवित्र चैत्य आदि दयेकेत सरकारी स्तरया पत्र साथ छत्रया हल । अले वर्मा पाखें जूगु निर्माण ज्याय् अव्यवस्था कथं मजुइकेत सर अलेक्जण्डर कनिंघम व डा. राजेन्द्र लाल मित्र सुपरभाइजर कथं थन वल । तर लिपा आंग्लो वर्मा युद्ध (Anglo-Burmese War) जुल । अथे नं एक लाख खर्च याना भारत सरकारं थ्व निर्माणया ज्या पूर्ण हे यात । लाइट अफ एशिया (Light of Asia) या लेखक सर एडविन आर्नोल्ड (Sir Edwin Arnold) थः यात्रा यानाबले जोर्णोद्वार जुया च्वंगु स्वया दकसिबे ह्लापां बुद्धगया हेरचाह यायेगु ज्या बौद्धपिनि ह्लातय् लायेमाः धका धाल । तर व खँ अर्थे वन । १८६१ ईसवी अनागारिक धर्मपालं थ्व ज्या ह्लातय् कया बिज्यात । आपालं आपालं विभिन्न संघर्ष लिपा, मुद्दां लिपा, राजनैतिक प्रभावं लिपा छगू समितिया ह्लातय् बुद्धगया लात अले बौद्ध देव, बोधिसत्व व बुद्धयात विभिन्न हिन्दू देव देवी कथं याना वीगु परिचयं नं बुद्धगया मुक्त जुल ।

थ्व जुल बुद्धगयाया संक्षिप्त इतिहास । हानं थुकिं स्पष्ट जुल, बुद्धगयाय् नेपाःया जुजुपि, भिक्षुपि व श्रद्धालुपि इलय् विलय् दर्शन पूजनया निम्ति वनावं च्वंगु खँ । लिसें कपिलवस्तु (निग्लिहवा) य् च्वंगु अशोक स्तम्भय् “ॐ मणिपद्मे हूँ” श्री रिपु मल्लस्थिर जयतु १२३४” च्वया

---

1 स्वया दिसैः- A Guide to Buddhagaya, Devapriya Valisinha,

तःगु व लुम्बिनी च्वंगु अशोक स्तम्भम् “ॐ मणिपद्मे हूँ ।  
 श्री रिपुमल्लस्थिरञ्जयतु संग्राम(मल्ल जय)” च्वया  
 तःगुलि पश्चिमी मल्ल जुजुपि इसवी १३१२ तक बौद्ध  
 तोर्थाटन याःवनेगु याना च्वगु खँ प्रमाणित जू । बाज्याह्य  
 अशोक चल्लं महाबोधि या यात्रा याःगु व छय्हा रिपुमल्लं  
 कपिलवस्तु लुम्बिनी यात्रा याना काठमाडौंस बुंगमती  
 महास्तान यात । बुंगद्योयात कोष छाःगु कान्तिपुरया चैत्य  
 (स्वयम्भू ?) पूजा याना बहाःया भिक्षुपि फुककसित भोजन  
 याकल ।

### विभिन्न देशय् बुद्धगया

बुद्धगया महाबोधि प्रति श्रद्धा तथा विभिन्न बौद्ध  
 देशं थः थः थाय् देशय् बुद्धगयाया ‘महाबोधि’ चैत्य  
 दयेकल । चीनया वर्तमान पेकिङ्ग निगू माइल उत्तर-  
 पश्चिमया कुने पिने महाबोधि चैत्य दयेकल ।<sup>1</sup> थ्वयात  
 व - त - र्जे (WA - T' A - SZE) धाइ । थुगु देगः ईसवी  
 ४७३ स दयेकूगु खः । थुगु देगःया प्यखे कुने च्वंगु मुदेगः  
 थें जाःगु चीचीगःगु देगःत बुद्धगयाया महाबोधि देगः तये  
 अनुपातय् चीचीगः खने दु ।

बर्माय् पगां धयाथाय् नं बुद्धगयाया ‘महाबोधि’ या  
 चीगोगु चैत्य नमूना दु । थ्व बर्माया ‘महाबोधि’ चैत्य  
 १२१०-१२३४ शताब्दी नन्दौग्या (NANDAUGMYA)

1 Nepal Perceral London, Kath, 1976, Page 42.

द्वारा दयेकूगु खः ।<sup>1</sup> बर्मियागु महाबोधिया प्यखें च्वंगु कुं कुं या चैत्य बुद्धगयाया महाबोधिया छाँट वः । दथुइया चैत्य छकोल स्वात थहाँ वना बांला ।<sup>2</sup> तर दथुइ च्वंगु मू चैत्य त्रिपुरेश्वरया देगः थें ग्वारचाचि हानं जाःनं मगाःगु<sup>3</sup> छगः चैत्य भूलं बर्मियागु महाबोधि धका नं वयना तःगु दया च्वन । शायद थ्व कालान्तरय् जीर्णोद्धार जू बले जक दथुया मू चैत्य थथे जू वंगुला धयाथें च्व । नेपालय् महा भूकम्पं लिपा तत्कालीन सरकारं त्यंगु अर्थे सुरक्षित याना दथुया देगः बां जक मदायेक दयेका छ्वयेगु सुकाव व्यूगु खः । धातर्थे अवले अथे हे दयेका छ्वःगु जूसा थौया महाबुद्धया स्वरूप खने दइगु मखु जुइ ।

श्री लंकाय् बुद्धया सम्बोधि स्मारक कथं अशोकया म्हाय् भिक्षुणी संघमित्रां हे बोधिवृक्ष यकूगु खः । उगु पवित्र बोधिवृक्ष आःतकं अनुराधपुरय् वाउँ वाउँ धाया च्वंगु दु । लिपा श्री लंकाय् नं महाबोधिया चैत्य दयेकल ।

थाइलैण्डया बुद्धगयाया महाबोधि चैत्य चिंगमाइ (उत्तरी थाइलैण्डय्) दु । थ्वयात थौंक्ल्ले चेदि चेद् योद् (Chedi Chet Yod) धाइ । थ्वयात ह्लेगः चैत्य नं धाइ ।

- 
- 1 A Guide to Buddhagaya, Devapriya Valisriha, Indla, 1950, Page 6.
  - 2 Pictorial Guide to Pagan, U Lu Pe Win, M. A., Director, Archaeological Survey, Burma, 1955.
  - 3 The Image of the Buddha, D. L. Snellgrove, Calcutta, Page 421.



थुगु चैत्य लन्ना (Lanna) या जुजु तिलोकरत (King Tilokrat या पालय् दयेकूगु खः । थुहा जुजुं मिन दम फ्रा खोट (Muen Dam Phra Khot) धयाहा अफिसरयात ईसवी १४४५ स महाबोधि बुद्धया ल्हाया नमूना कायेके छःगु खः । निदं थुगु महाबोधि दयेके सिधल थुगु महाबोधि चैत्य पूर्ण जुइवं जुजु तिलोकरतं त्रिपिटकज्ञ भिक्षु फ्रामहा थेर (Phramaha Thera) निमन्त्रणा याना धर्म संगायाना यात ।

थुगु थाइलैण्डया चिंगमाइस्थित महाबोधि वन्याया तल्ला छगू हनर्थे तःधं । अले प्यखें च्वंगु विचोगोगु चैत्य तःगोगु मू चैत्यया अनुपातय् बुद्धगयाया चैत्य सिवे तःगो खने दु । न्ह्योने पाखे हान निगः चीभार्थे दु । उकि हे श्रवात ल्हागः चैत्यया चैत्य धायेगु याःगु खः ।<sup>1</sup>

### महाबोधि : महाबुद्ध

बुद्धगयाया 'महाबोधि' थुकथं चीन, वर्मा, लंका, थाइ-लैण्डय् दुर्थे नेपालय् नं दइगुला स्वाभाविक खँ हे खः । छाया धाःसा नेपालं बुद्धगया तःसक सःती । नेपालय् "महाबोधि" यात "महाबोधि" धका हे अथवा "महाबुद्ध" धका धाइ ।

मह'बुद्ध गवले दयेकल धयागु वारय् थी थी विचाः दु । गुलिसिनं भगवान बुद्धया बुद्धत्व प्राप्त जुगु बुद्धगयाया

---

1 In the ancient city, Published by Muang Boron Journal, Thailand 1979, Page 126/127.

चैत्य स्वया थुगु चैत्य इसवीया १७ गूगु शताब्दी दयेकल<sup>१</sup>  
 धका धाःसा गुलिसिनं वंशावली कथं १३ गूगु शताब्दी  
 दयेकल<sup>२</sup> धका नं धाः । तर आपासिनं १६ गूगु शताब्दी  
 दयेकल धका धाइ<sup>३</sup> वर्थे हे महाबुद्ध निर्माण कालय् यलयाह्म  
 जुजुया व रय नं थी थी विचाः दु । गुलिसिनं जुजु महेन्द्र  
 मल्लया राज्यकालय् धाइ ।<sup>४</sup> गुलिसिनं सदाशिवया राज्य

---

1 The Image of the Buddha, Page 422.

2 Medieval Nepal, Part I, Dr. D. R. Regmi, Calcutta 1965, Page 602.

3 I Medieval Nepal, II Dr. D. R. Regmi, Calcutta 1966, Page 892.

II नेपाल उपत्यकाको मध्यकालीन इतिहास, सूर्य विक्रम ज्ञवाली, काठमाडौं, २०२६ (१५८५ ई मा समाप्त भएको)

III The Temple of Nepal, Ronald M. Bernier, New Delhi 1978, Page 74.

IV नेपालको मध्यकालीन कला, श्री मन बज्र बज्राचार्य काठमाडौं, पृष्ठ १६७ (१६५७ वि. सं. मा बनेको थियो)

V Kathmandu Valley VIENNA.

4 The Temple of Nepal, Ronald M. Bernier, New Delhi, 1978, Page 74. "The Maha Bauddha temple in an Indian style Sikhara temple of brick built during the reign of King Mahendra Malla, before 1585 according to Perceval London.

कालय् धका धाइ ।<sup>1</sup> हानं गुलिसिनं शिवसिंह्या राज्यकालय्  
धका धाइ ।<sup>2</sup>

महाबुद्धया निर्माण काल व उगु इया जुजुया बारय्  
थी थी विचाः खने दुथें महाबुद्ध निर्माण य'ह्य व्यक्तिया बारय्  
नं भिन्न भिन्न नां खने दु । बुद्ध धर्मप्रति श्रद्धालु जीवराज  
नेपाल थःगु जन्मभूमि बुद्धगयाय् विज्यात । अन छुं दिं चवना  
नेपाल उपत्यकाय् लिहाँ विज्याःबले बुद्धगयाया 'महाबोधि'  
चैत्ययागु हे नमूना कथं छाः चीगागु आकारय् महाबोधि  
दयेकेगु विचाः यात<sup>3</sup> धका गनं च्वःसा गन अभयराज शाक्यं  
बुद्धगयां लिहाँ वया दयेकूगु खँ उल्लेख याइ ।<sup>4</sup> अक्  
अभयराज हे शाक्य मज्जेसे बज्जार्चाय यांना तःगु नं गनं खने  
दु ।<sup>5</sup> थुगु हे रूप "महाबुद्ध" दयेकेत बुद्धगयां योजना ज्वना

---

1 Nepal, Percival London. Kath., 1976, Page 41/42

During the reign of his son Sada Shiva the very  
remarkable temple in Patan Called Mahabuddha was  
built.

2 नेपालको मध्यकालीन कला, श्री मन वज्र वज्जार्चार्य,  
काठमाडौं, पृष्ठ १६७

शिवसिंहको समयमा पाटनमा एक नयां शैलीमा मूर्तिया  
मन्दिरको निर्माण भएको थियो । यो मन्दिर महाबौद्ध  
मन्दिरको नामले जगत्प्रसिद्ध छ ।

3 The Temple of Nepal, Page 74.

4 Medieval Nepal, II Page 892.

5 Medieval Nepal, I Page 602.

वना धका बुद्धगयां लुं नक्सा चित्र (Drawings) ज्वना  
 वःगु महु धका<sup>१</sup> वत्तावत्तो बुद्धया नमूना मूर्ति ज्वना बल  
 धयागु हे महाबोधि चैत्यया नमूना ज्वना वःगु जुइ धका<sup>२</sup>  
 धाईपि नं दु ।

“जीवराज” व “अभयराज”या वारय् कून त्वाकः  
 बुकःगु खँ न पिहाँ वया च्वंगु दु । जीवराज धयाह्य छह्य  
 बौद्ध पण्डितं थुगु मन्दिर दयेकूगु खः । थ्वया अबु  
 अभयरजया स्वह्य विवाह जुइ थुंकूगु खः । थ्वया निह्य  
 जहान व काय्पि दयेकं नं थुह्यसिन प्यह्यह्य मिसा विवाह  
 याःवले काय्पि अबु खना असन्तुष्ट जुल । थुगु खँ  
 थुइका थः काय्पिनिगु बन्दोवस्त याना अभयराज थः  
 कान्छोह्य जहानलिसें गयाय् वना च्वन । अन स्वदँ च्वने  
 थुंबले छह्य काय् दत । वयात बौध्दजु धका नां तल ।  
 अभयराज अनं लिपा नेपालय् लिहाँ वया थः अबु मदयेवं  
 सूर्य मल्लया पालय् टक्सारया डिठ्ठा नायक्या जागीर नया  
 च्वंगु थःह्य व जागीर नल । अभयराजं हे थ्व महाबौध्द  
 देवालय दयेकेगु प्रारम्भ याःगु खँ वंशावलीं सी दु ।  
 तर थुगु मन्दिर दयेकेगु ज्या सदाशिव मल्लया पालय्  
 अभयराजया काय् जीवराजं पुवंतल । थुगु मन्दिरया निर्माण  
 १५८५ ई. आ. ७०५ ने. संस समाप्त जूगु खः <sup>४</sup>

1 Medieval Nepal, II Page 892.

2 Nepal, Page 42 (Foot Note).

3 The Temple of Nepal, Page 74.

4 नेपाल उपत्यकाको मध्यकालीन इतिहास, पृष्ठ १२६/१३०

थथे व्याक्क खँय् थी थी विचाः खने दुगुया  
कारण “महाबुद्ध” या वारय् प्रामाणिक इतिहास मदया खः ।  
उकिं कीसं महाबुद्ध इतिहास माले हे माला च्वंगु दु - व नं  
मेयाय् मखु, कीथाय् सफु सफुनी, तालपत्र, ताम्रपत्र व  
शिलापत्रय् !

श्री बाबुकाजी शाक्य याके दुगु तालपत्र कथ  
७८२ नेपाल सम्बत् तक वकू बहालया श्री जिवराजदेवजु  
छह्य खने दु । परम्परा कथं ल्ह्यया तःगु अभयराजया वंश  
वृक्ष कथया तृतीय पुत्र मयरजु नं ७०८ ने. सं. या छगू  
तालपत्रय् “श्री वंकूबाहार श्री शाक्यवंश श्री मयरजु” खने  
दु । मयरजुया निह्यह्य काय् जयदेवजु “ने. सं. ७४४ श्री  
यंछुबाहार शाक्यवंश श्री जयदेवजु” कथं स्वह्यह्य काय्  
“श्री वंकु बाहार महाबोधि गृह् श्री अमृतजु” कथं खने  
दया च्वंगु दु ।

थुकथं थःयाय् दनिगु प्रमाणत माला लुइका यथार्थ  
खँ प्रकाशय् हयेगु कीगु कर्तव्य खः ।

## अभयराज युग न्ह्यो

आः विचाः याये अभयराजया युग न्ह्योया छुँ खँय् ।  
थुगु खँ वयागु बुद्धगयाय् वनेगु श्रद्धा व वीर्यय् छुँ खँ  
स्पष्ट जुइ ।

नेपाल प्राचीन कालनिसें भारत व तिब्बतया  
लँपुइ लाःगु देश जुया च्वंगु खः । गुसःदं ति न्ह्यो ला

बुद्धधर्म अध्ययन-अध्यापन ज्याय् थ्व लँपु तःसकं ज्यले  
 धुंकुगु खने दु । नेपाःया बौद्धपिं थ्व लँय् जुइगुली अभ्यस्त  
 हे जुइ धुंकुल । भारतया विक्रमशील, नालंदा व बज्राशनथें  
 जाःगु विद्या केन्द्रया आचार्य भिक्षुपिं सँदेशय् धर्म प्रचार  
 यायेत नेपालं हे वगु खः । अरु थनिं न्हेसःदँ ति ह्तापा  
 नेपाःया हे संघश्री व सुगतश्री सँदेशय् धर्म प्रचार यायेत  
 वन । खुसःदँ ति न्ह्यो अरनिको नेपाली कलाकारपिनिगु  
 प्रतिनिधिपिनि नेतृत्व याना संदेश व चीन वन । पश्चिम  
 या खस जुजुपिं लुम्बिनी व बुद्धगयाय् वथें काठमाडौं  
 उपत्यकाय् नं वः । उकिं थुजागु धर्मया वातावरणय्  
 अभयराजयाके बुद्धगया (भारत) वनेगु श्रद्धा वीर्य उत्पन्न  
 जुइगु थःगु हे युगया बल्लागु परम्पराया महान प्रेरणा खः ।

### अभयराजया श्रद्धा व वीर्य : परम्परा कथं

अभयराजया विश्वस्त जीवनी ला बांलाक बी थाकु  
 नि । अथे नं वंशावली न्ह्यथनीगु घका परम्परां उल्लेख  
 याइगुया सारांश थथे खः-

अभयराज यलया वकुलि रुद्रवर्ण महाविहारया  
 संस्कारक श्री शिवदेव वंशजः क्षेत्रीय शाक्य खः । वया  
 अबु खः, श्री मद् नायक । व तःधंगु श्रद्धा व अद्भूत  
 वीर्य - वलं बुद्धगयाय् वन । हानं अनं हे सिजःया ध्येवा  
 दयेकेगु प्रेरणा व संकल्प ज्वना नेपाः वलः । अले जुजु  
 अमर मल्लयात थह्यं हे सिजः खानीं सिजः हया ध्येवा  
 दयेका व्यूगुलि वयात सिरपाः नं विल । थ्वहे ध्येवां धर्म

चित्त उत्पत्ति यांना थह्मं स्वया वयःगु व मती तथा  
 वयागु कथं 'महाबोधि' या प्रतिरूप महाबुद्ध दयेकेत वं ६८५  
 ने. सं. स. जःग. तल । थुबले तकं महेन्द्र मल्लया राज्यकाल  
 शुरू जुई धुंकूगु खः । हानं थ्व पुण्य प्रतिज्ञा पुवके मलावं  
 थःगु ज्या थः न्याह्य काय्पित लःल्लाना अभयराज दिवगत  
 जुल ।

## अभयराजया काय् व छय्पि

अभयराजया न्याह्य काय्पि खः, मयरजु, व्यधरजु,  
 जगन्नाथजु, हेरजु व बुद्धजु । वंशवृक्ष कथं थुपि सिबे  
 च्वययापि काय् नं अभयजोति व दुयजु धयापि निह्य ।  
 यद्यपि थुपि नां गय्थें गय्थें च्वं । हानं मयरजु, व्यधरजु,  
 जगन्नाथजु व हेरजुं "महाबुद्ध" चैत्य छतँ हे जक थःपिनि  
 जीवन कालं जायेके फत । इपि मदया वन । दच्छि लिपा  
 बुद्धजुं थह्मं थः काय् जीवराजं व छय् जयमुनिया ग्वाहालो  
 कया हानं चैत्य दन । तर वं नं निदँ जक थ्व ज्या  
 याये फत, चैत्य जा हे मजानि बुद्धजु नं परलोक जुल ।  
 अले थ्वयां लिपा बौ-काय् जीवराज व जयमुनि हानं हि  
 स्वदँया श्रद्धा व वीर्य थ्व देगः सम्पूर्ण याये फत । सम्बत्  
 ७२१ आषाढ शुक्ल ७ स श्री शिवसिंह मल्लया ल्लानं  
 'महाबुद्ध' या प्रतिष्ठा जुल ।<sup>१</sup> मेगु धापु कथं अभयराज,

---

<sup>१</sup> जन्तप्रसिद्ध श्री महाबुद्ध मण्डलया वर्णन, श्री नरेन्द्र  
 नरसिंह शक्य, धर्मोदय १/८-६

बुद्धजु, जीवराज व जयमुनिजुं थ्व चैत्य दयेकल । जयमुनिजु  
तधह्य पण्डित खः <sup>1</sup>

## छुं बिचाः

आः थुपि खँय् छुं भति बिचाः याये । महाबोधि दर्शन  
यायेत अभयराज याकःचा वनला वा गगुं धार्मिक मण्डल  
नाप वन ला । अभयराजया निह्य जहान दुगु वंशवृक्षं वयं ।<sup>1</sup>  
उकि जहान लिसें बुद्धगया वंगु खँय् अप्वः सत्यता दु ।  
त्यागी जुया वना प्रेरणा कया लिहाँ वयेगु सिबे विवाह  
धुंका बुद्धजु दये न्ह्यो वया मां व्वना श्रद्धा वोर्य वगु खँय्  
बिचाः याय बहः जू वथें हे बुद्धगयायागु 'महाबोधि'  
या किपा वा नमूना नुगलय् जक तया हल ला अथवा छुं  
चवया दयेका हे हल, थ्वन धाथे अःपु मजू । यःगु थ जु,  
थःगु हे जीवन-कालय् महाबुद्ध दयेके सिधयेके मफया नं  
बर्मा व लकां दयेकूगु सिबे दुरुस्त च्वंक, तगोगु  
व बाँलागु 'महाबुद्ध' निर्माण जूगुलि थुलि अवश्य स्पष्ट याः,  
अभयराजया व वया कुलया ह्लाती स्वयं विद्याया कलात्मक  
पुरुषार्थ दु । हान अभयराजं महाबुद्ध दयेकेत ह्लापां  
महाबोधिया किपा वा नमूनाया स्पष्ट रूपरेखा तयार यात  
हे जुइ, गुगु स्वया वया कायपि व छय्पिसं नं अभयराजया  
नुगलय् च्वंगु देगः धात्थें पुवंक दयेके फत ।

थ्व महाबुद्ध दयेकेत ३६ दौ वित । थ्वयागु  
निर्माणया भूमिकानिसें ह्यनि अमर मल्ल, महेन्द्र मल्ल,

---

<sup>1</sup> परिशिष्ट १ स्वया दिसँ ।



सद शिः मल्ल व शिवसिंह मल्लपिनि शासन-काल कय्पू ।  
सदाशिवया राज्यकालय् जीवराज धयाह्य छह्य बौद्ध भिक्षुं  
बुद्धया स्वया वया महाबुद्ध दयेकल धका धासां वास्तविक  
कयं जीवराजया बाज्या ब ककपिसं हे थ्व ज्या प्रारम्भ  
य ये धुकूगु खः । उकिं इतिहासं जीवराज केयुया 'महाबुद्ध'  
या निर्माण सदाशिवया राज्यकालय् कयंसां 'महाबुद्ध' या  
निर्माणकाल महेन्द्र मल्लया राज्यकाल तक जू वने फु ।

महाबुद्ध दयेकेत ३६ दँ वीगुया कारण थ्वया अर्थ  
व्यवस्था व विशेषतः सूक्ष्म महान कलात्मक ज्यां खः ।  
छाय्धाःसा थ्वया वंशत्र न्हेकुतुं जूवले तकं किंगुपी नोपी  
बुँ दयेवं अवलेया अर्थ व्यवस्थां इमित ध्येवां थाकु मजुल  
जुइ ध ये फइ मखु । मेखें थ्व ज्यामितया याउँक दनेगु  
छेँ नं मखु । अभयराजं सिजःया ध्येबा दयेकेत वा ध्येबा  
मुनेत दुःख स्यूगु जनश्रुति धाः, वं थःगु श्रमं हे ध्येबा  
मुन । ६६९ ने. सं. या तुलजा भवानी थें थःगु इलय्  
मह न विशेषतां युक्तगु अद्भुतगु कलाकृति जुया नं महाबुद्ध  
याकनं निर्मित जुइ मफुगुलि थुकी राजकीय सहयोग मदुगु  
नं खनेदु । थ्व, देशय् दकसिबे तःजाःगु मुक्कं शाक्यमुनि  
बुद्धया मूर्तिगु देगः छ्गू कलाकार परिवारया श्रद्धालु इच्छां  
दयेकूगु खः । उकिं हे जनसहयोगय् जक भर काये माल  
जुइ । वरू थ्व पुवनेवं जुजु शिवसिंह उद्घाटन याःगु खँ  
धात्ये विवेचनीय जू । यद्यपि शिवसिंह मल्लं बौद्ध देगःया  
निर्माणय् नं छुं ग्राहालि याःगु खने मदु ।

## ह्लापांगु तःजागु व कलात्मक देगः

महाबुद्ध धात्थें थःगु युगय् सर्वोच्चगु व अतुल्य कलात्मकगु देगः खः । छायाधाःसा अवले यलया लायकया कृष्णदेगः मदुनि, येंया हनुमान ध्वाखा, स्वयम्भूया जः खः च्वंगु अनन्तपुर प्रतापपुर मदुनि ख्वपया ५५ ऊयाः व न्यातपौ देगः आदि नं मदुनि । विभिन्न प्रकारया छें मन्दिर मध्ये यलयागु महाबुद्ध चैत्यया नं अलग हे मौलिकता दु । थुगु ढंगया चैत्य देगः की उपत्यकाय् यक्वं उखें थुखें खने दु । इपि फुक्क मन्दिरत मध्ये यलया महाबुद्ध मन्दिर हे ऐतिहासिक दृष्टिकोणं दकासवे पुलांगु सत्य जू । उकिं थुजागु प्रकारया देगःत महाबुद्धयागु हे आदर्शय् दयेकूगु धायेगुली छुं आपत्ति मदु ।<sup>१</sup> थुकिया अर्थ, खः, यलया लायकू फाँतय् च्वंगु कृष्णदेगः, लुंहिटी च्वंगु योगनरेन्द्रया ईयागु विष्णु मन्दिर, यलया हे देगुतले न्ह्योने च्वंगु सिद्धिनरसिंहं दयेकूगु नृसिंह मन्दिर, स्वयम्भूया प्रतापपुर व अनन्तपुर व्याक्कं महाबुद्ध निर्माणं लिपा बौद्ध देगःया अनुकरणय् दयेकूगु विभिन्न देव देवीया देगःत खः । थुकथं छगू न्हूगु शैलीया देगः नेपालय् दुतिकेगुया श्रेय 'महाबुद्ध' या निर्माता शाक्य बौद्ध कलाकारपित दु ।

उकिं नेपाःया देगः देगःतय् इतिहासय् लिसें तया ब्वनेत्रं स्वयं स्पष्ट जू, महाबुद्ध बौद्धपिनिगु स्तूप वास्तुकलां लिपाया ह्लापांगु धैथें शिखर शैली वास्तुकलाया देगः खः ।

---

१ नेपालको मध्यकालीन कला, पृष्ठ २५४

हानं थ्व थःगु युग्या नेपाल्य ह्लापांगु व अद्भुतगु  
कलात्मक चैत्य ।

## बुद्धगयाया महाबोधि व महाबुद्ध

बुद्धगयाया महाबोधि व यलया थुगु महाबुद्ध गुलि  
पाय्छि कथं उथें च्वं धाये थाकु । छाय्धाःसा बुद्धगयाया  
महाबोधि गुलि गोकः पुननिर्माण जुइ धुंकल च्वय् वर्णन  
जुइ धुंकल । पाटलिपुत्रया खुदाइस लूगु छगू मुहरय् बोधगया  
मन्दिरया प्रतिकृति दु धका धाःसां प्रकाशय् वःगु मखनागुलि  
थ्व पुननिर्माणया क्रमय् गुलि गथे आरम्भिक ढांचा ल्यं दनि,  
महाबुद्ध निर्माणया निति नमूना दर्शन याःबले महाबोधियागु  
ढांचा गथे खः कीसं धाये मफु । उकिं डा. कनिष्कमया कुतलय्  
पुननिर्माण जूगु बुद्धगयाया वर्तमान महाबोधि व १६६०  
सालया महाभूकम्प लिपा पुननिर्माण जूगु महाबुद्धया दथुइ  
कलात्मक समानताया असमानताया तुलना याना महाबुद्ध  
दयेकूगु महाबोधिया दुरूस्त च्वं मच्चं धायेगु पाय्छि मजू ।  
गुलिखे पुननिर्माणं लिपा नं थःगु मौलिक आकार प्रकारय्  
अवशिष्ट जुया च्वंगु महाबोधि व महाबुद्धयात अय्क स्वयेव  
दुरूस्त वःगु शैली व कलात्मक सामुहिक अभिव्यञ्जन हे  
वास्तवय् कम आश्चर्यजनक कलात्मक प्रतिभाया उदाहरण  
मजू । अरु श्रीलंका, बर्मा, थाइलैण्ड व चीनयागु महाबोधिया  
अनुकृतित मध्ये यलया थुगु महाबुद्धं अप्वः महाबोधि लिसे  
अनुपात कथं व कलात्मक कथं सादृश्यता वयं ।

महाबोधिया मूलुखा पूर्व पाखे खः । श्व हे खँ  
महाबुद्धयागु खः । निगलं चैत्यय् भूमिस्पर्श बुद्धमूर्ति  
प्रतिस्थापित जुया च्वगु दु । महाबोधि व महाबुद्धया दकसिबे  
क्वय्या तल्ला भाग वर्गाकारय् खः । महाबोधि वर्गाकार  
५० फीट प्यकूलाः जू । हानं श्वया जाः ऋण्डै २० फीट  
दु ।<sup>१</sup> महाबुद्धया वर्गाकार पूर्व-पश्चिम २४' ३" अले  
उत्तर-दक्षिण २२' ६" दु । जा ऋण्डै ३० फीट दु । श्वयां  
क्वय्या तल्लानिसें च्वय् पाखे क्रमशः चीगः जुया च्वंगु  
पिरामोड कथं तप्यंक कूलूगु "महाबोधि" स खने दु ।  
"महाबुद्ध" य् नितंगु तल्ला नं वर्गाकार कथं हे खने दु ।  
अले अनं च्वय् क्रमशः चीगः जुया वंसां कुं धार मलूगु  
कथं गोलाः थें आकार वः । बुद्धगयाय् महाबोधि छतं  
जक थौंकहे थहाँ वने ज्यू अले च्वं हे छचालं देगः चाहिले  
ज्यू । थहाँ वनेगु स्वहाने मूल सिंहासनस्थ बुद्धया न्ह्योने  
खः । थुपि हे खँ 'महाबुद्ध' या वारे नं खः । बुद्धगयाय्  
नितंगु तल्लाय् दथुइ कोठा खालि, तर महाबुद्धय् अथे  
मजू । बुद्धगयाय् नितं च्वय् थहाँ वनेगु लँपु खने मदु ।  
महाबुद्धय् आःतकं प्यतं थहाँ वने ज्यू । भूमितल्लाय्  
शाक्यमुनि बुद्ध अनं च्वय् क्रमशः अमिताभ बुद्ध, चैत्यराज,  
वागीश्वर धर्मधातु तक दर्शन याये ज्यू । महाबुद्धया म्ये  
कथं अनं च्वय् वज्रधातु व चैत्याकार चूडामणि दु ।

---

<sup>१</sup> भारतीय प्राचीन स्तूप, गुहा एवं मन्दिर, डा. वासुदेव  
उपाध्याय, भारत, १९७२ पृष्ठ २११

महाबोधि व महाबुद्ध्य क्रमशः चीगः जुया वंगु  
 चैत्यं छकोलं गजू मलुइकुसे चव्यु हानं दबूथें माथं वंका  
 बी । अले थुगु हे माथनय् चैत्य प्रतिस्थापित याना  
 तःगु दु । प्रत्येक तल्लायात सोदयेक प्यखें अजन्ता शैलीया  
 ऊयाः बुट्टा “महाबोधि” स दु, “महाबुद्ध” य् थ्वया थाय्  
 ऊयाःहे दु । शायद महाबोधिया ऊयाः बुट्टा कनिघमया  
 कृति खः । छाय्धाःसा क्वय् छतय् आःनं लुखा ऊयाः  
 सी दनि । महाबोधिया उचाई १६० फीट<sup>१</sup> निसें १८० फीट<sup>२</sup>  
 तकया उल्लेख याना तःगु दु । व्हेनसांग नं बोधिवृक्षया  
 पूर्वय् च्वंगु देगः कण्डै १६०/१७० फीट तः जाः धकाः  
 च्वया तःगुलि<sup>३</sup> स्पष्ट याः । महाबोधि थःगु प्रारम्भिक जाः  
 ताकालतकं सुरक्षित याना तल । महाबुद्धया जा भूमिनिसें  
 गजु तक उँचाई ६३’ १०” दु ।<sup>४</sup>

महाबुद्ध चाया चां दयेका तःगु चैत्य खः । थुको  
 अप्पापति धयार्थें बुद्धया मूर्ति दु । तिब्बती श्रद्धाय् थ्वयात  
 “गुप्तः बुद्धया चैत्य” धाइ । अय्कः ल्या खायेवले जम्मा  
 भगवान् बुद्धमूर्ति ३३४१ व चतुर्ब्रह्मा, बज्रसत्त्व, तारा

---

१ भारतका बौद्ध तीर्थ, काठमाडौं, पृष्ठ १४

२ प्राचीन भारतीय स्तूप, गुहा एवं मन्दिर, पृष्ठ २११

३ A Guide to Buddhagaya, Page 21

४ प्यतं तक यहाँ वना सुका कुरका दाना काःगु ४२’ १०”  
 व लिक्क च्वंगु तःजागु छें अन्दाजं दाःगु २१’ याना  
 जम्मा ६३’ १०” ।

छाका व बत्लाका तल । थ्व छगू तःधंगु आविष्कार खः  
 धाःसां ज्यू । थुगु प्रकारया मूर्तिया निर्माणं नेपाली  
 मूर्तिकलाया इतिहासय् छगू न्हूगु अध्याय छुना ब्यूगु दु ।  
 महाबुद्धय् थासय् थासय् तथा तःगु अनगिन्ति मूर्तिमध्यय्  
 अक्षोभ्य, वैलोचन, रत्न सम्भव, अमोघसिद्धि, अमिताभ, सूर्य,  
 चन्द्र, चतुर्दिकपाल लोकेश्वर, बोधिसत्त्व आदि कयना (नं)  
 तःगु दु । थुपि ब्याक्क मूर्ति बांलाक दयेका तःगु दु ।  
 थुगु मूर्तिमय मन्दिरया अस्तित्व दतले प्रत्येक नेपालीया  
 गौरव पताः विश्वमञ्चय् फरफर ब्वयां च्वनी ।<sup>1</sup>

## अभयराज कुल

अभयराजया थुगु श्रद्धा व वीर्यया कारणं थ्व  
 अभयराज कुल हे महान कुल जूवन । अभयराजया सन्तानं  
 महाबुद्धया जःखः यववं बहाः दयेकल थ्वया न्हेकुतुंया  
 सन्तानय् ह्लापांह्यं यशुबहाः निह्यह्यं स्वकः सम्यक् न्यायेका  
 नरबहाः स्वह्यह्यं सिकुचाबहाः, प्यह्यह्यं त्वाय्बहाः न्याह्यह्यं  
 जयाबहाः दयेकल धयागु जनश्रुति नं दु । खुह्यह्यं जक  
 अंश मकासे बही जोर्णोद्वार याता अन च्वं वन । थ्वया  
 हे अंश (फिहेपी बुं) देशिपूजा न्यात, आदिवाः सिवा व  
 चवंल पुह्ली धुंकेगु जुल धका नं धाइ । थ्व पंक्तिया लेखक  
 वहीया हे फिनिकुतुंया वंशज खः । न्हेह्यह्यं अंश मकासे  
 भिक्षु जुया बहिली च्वंह्य खः । थ्वया हे अंश पञ्चदानबले

---

<sup>1</sup> नेपालको मध्यकालीन कला, पृष्ठ १६७/१६८

महाबुद्धय् आःतकं स्वचकं पःछि ह्यं सख्वा जाकि दान बीगु  
व त्यांगु ज्यावलि पूजां यःमरि दयेका ह्यं निगः निगः बीगु  
याइ । थुपि जनश्रुति व परम्परां स्पष्ट याः, अभयराजं थः  
कुल हे आदर्श कुल जुइ फयेक श्रद्धा व प्रेरणा बिया वन ।

## महाबुद्धया जीर्णोद्धार

अभयराजया थ्व कीर्ति-स्तम्भ महान श्रद्धा व  
वीर्यया प्रतीक महाबुद्ध १६६० सालया महाभूकम्पय् दुं  
वन । भूकम्पय् च्वय्या वच्छि दुन धाःसां<sup>१</sup> विस्तृत कथं  
हे विनाशयात धाःसां<sup>२</sup> पूरा हे दुन धाःसां<sup>३</sup> वास्तवय् नितं  
जक त्यां जुइक दुन । थ्वयात हानं ह्लापाथें हे दयेकल ।  
थ्वया पुननिर्माण अवस्थाय् ह्लापा स्वया चीगो जूगु मदु ।  
तर थ्वया वशजं गथे महाबुद्धयात हानं जीर्णोद्धार मयाइ ?  
जोथाबहाःया बुद्धिनरसिंह व बौद्ध बहाःया देवराजं थःगु  
छुं जग्गा बंध तल, सरकारयाके ३१०० दां त्याय काल ।  
गुगु दां ने. सं. १०५८ जेष्ठ सुदी बुधवार खुनु प्रतिष्ठा  
याः वःह्य जुद्ध शम्शेरं माफी बिल ।

थ्व जीर्णोद्धार यायेत ह्लापाया थासा लुइकेत नं  
गुलिखे कुतः यात तर मलू । लिपा हानं थासा दयेका

---

1 Medieval Nepal, I, Page 602

2 Medieval Nepal, II, Page 892

3 The Temples of Nepal, Page 75

Even though the temple was rebuilt on a slightly  
smaller scale after having completely collapsed in the  
1934 earth-quake.

श्रव्या जीर्णोद्धार ह्लापा थें हे यात । थुकि स्पष्ट याः,  
अभयराजया कलात्मक परम्परा व श्रद्धा वंगु लुं दँ न्ह्यो  
तकं थःगु कुलयात प्रेरणा विल ।

श्रव जीर्णोद्धारया न्याछु थकालि खः, (१) महाबुद्धया  
च्वापुधन, (२) थैनाया लक्ष्मण, (३) सिकुबो बहाःया  
कुवेर, (४) महाबुद्धया सिद्धानन्द । गोष्ठि सहायक खः  
जोथाबहाःया बुद्धिनरसिंह, बौद्ध बहाःया देवराज चाया  
त्रिधि महाबुद्धया कुलीशाचार्य श्री जीतेन्द्रानन्द पण्डितं कन ।  
शिल्प प्रमुख खः सिकुचा बहाःया जोगमान, ज्याथाया  
पद्मज्योति । जनसम्पर्क व व्यवस्थापक खः, जोथाबहाःया  
सिद्धिनरसिंह । वथें हे त्वहँया ज्याय् भिचबहाःया सिहराज  
व सिद्धिवज्र, वज्रप्रेम्य वाकुननीया न्हुक्षेराज मानकाजो ।  
अःपा उइगु व छीगु कुह्याः ज्याय् खपि छेंया देवदास  
व न्हुछेलाल । त्या ब्याक्क ज्याथाया व्रतराजं तल ।  
अले अभयराज कुलया ६१ खा छेंया ब्याक्क सन्तानि थुको  
श्रमदान यात ।

थुकयं महाबुद्ध चैत्य या देःया देशय् छगः चैत्य  
जुया नं श्रव्या थःगु हे इतिहास दु, श्रद्धा व वीर्यया  
परम्परागत गौरवपूर्ण गाथा दु । श्रव चैत्य हे नेपाःया  
कलाकारतय् थःगु हि चःतिया, थःगु हे कीर्तिया, थःगु  
श्रद्धाया चैत्य खः, हानं श्रवहे चैत्य नेपाःया व चैत्य खः  
गुकि विशुद्ध बुद्ध-धर्म प्रेमया प्रतीक जुया शाक्यमुनि बुद्धं  
बोधि-प्राप्ति याःगु स्मारक लिसे तप्यंक स्वापू तया चवन ।



## परिशिष्ट १

(महाबुद्धया पण्डित खलःयाके दुगु अभयराज शाक्यया  
वंश वृक्ष)

अभयराज जुया काय प्रथम पुत्र श्री अभयजोतिजु, द्वितीय  
पुत्र श्री दुयजु, तृतीय पुत्र श्री मयरजु, चतुर्थ पुत्र श्री  
व्यघरजु, पंचम पुत्र श्री जगनाथजु, षष्ठम पुत्र श्री हेरजु,  
सप्तम पुत्र श्री बुद्धरिजु रिथुयान ॥ थ्व ति न्हसम काययातं  
वलि वन्ता विथा ओ ताथु थथिहा पुरुष श्री अभयराजजु  
जुया छयपनि श्री अभयजोतिजुया काय श्री मगरजु, श्री  
परुजु । श्री सेनखाजु ॥ थ्वति ॥

अहिस्सोन घक थ्वया ह्याया दुयिजुया दहआङ । राजा  
व्यागर जुयाओ दह अभयजोतिजुनं याका तनजुको कार ।  
थ्वपनि निह्य वहिरिस चोन । थ्व वेरसं निसें महाबुद्धया  
वहिरिस चोङ यात मथ्यात ।

वहिरया महाबुद्ध चोङयात मथ्यात । श्री २ पुन भाषा श्री  
मयरजु काय श्री ग्वारवुजु श्री जयदेवजु ॥ श्री अमृतजु ॥  
थ्वति ग्वारवुजुया काय श्री वसजु । श्री जयदेवजुया काय  
श्री देवसिंहजु । श्री गुरुजु । श्री नुगुजु । श्री महाकारजु ॥  
थ्वति । अमृतजुया काय श्री देवमुनिजु श्री बज्रपानिजु ।  
श्रीरत्नपानि जु । जु ।

ध्वति ॥ थनंरि ॥ श्री व्यद्वरजुया काय श्री ग्यानजु । श्री  
मनिकजु । श्री अनेकजु । श्री जियदेवजु रिथुयान । श्री  
ग्यानजुया काय श्री वावु देवजु श्री नरसिङ्गजु ॥

ध्वति ॥ श्री मानिकजुया काय । श्री जुघाजु ॥ श्री कुतुजु  
(कुतुवहाः) ॥

ध्वति ॥ अनेकजुया काय श्री जरप्पजु । श्री पद्मजु ।

ध्वति ॥ श्री विजयदेवजुया काय श्री रूतजु । श्री जरासिङ्गजु  
ख मसओ ॥

ध्वति ॥ ध्वनंरि श्री जगनाथजुया काय श्री अभयजु । श्री  
हाकुजु । श्री कमरायजु ।

ध्वति ॥ श्री अभयजुया काय श्री ग्यानकितजु । श्री देवजु ।

ध्वति ॥ श्री हाकुजुया काय श्री मुनिजु । श्री एन्द्रजु द्रदेवजु ।

ध्वति ॥ श्री कमरामजुया काय श्री कमववर जु । श्री  
कनकजु । श्री ग्यान देवजु । ध्वति ॥

ध्वनंरि । श्री हेरजुया काय । श्री हृदयपारजु । श्री समरजु ।

ध्वति श्री हृदयपारजुया काय । श्री जोतिराजजु । श्री कुसुम  
राज जु । श्री जयरत्नजु । श्री नग्यारजु । ध्वति ।

श्री समरजुया काय श्री दुयजु । श्री पारजु । ध्वति ॥ ध्वनंरि  
श्री बुद्धजुया काय । श्री जिरायदेवजु ॥ श्री नन्दजु । श्री  
जुगिजु । ध्वति ॥

श्री जिवरायदेवजुया काय श्री मुन्तामुनिजु ॥ श्री जयमुनिजु  
तवधड पंदित । श्री रत्नमुनिजु श्री देवर दडमा ॥ श्री  
गुरुजु ध्वति ॥

श्री नन्दजुया काय श्री पुरुमानजु श्री मानजु ! श्री जयदेवजु ।

श्रुति ॥ श्री जुगिजुया दड ओन श्रुति ॥

अभयराजजुया वंसच्छुषतो चोयाओ तया जुरो ॥ शुभ ॥

पुन भाषा ॥

श्री ३ महाबौद्धया श्री अभयराजजुन दुन्ता ववाथो दको गुथि

पारंयात दयकाव चोया । श्री वसजुया निरह्ण काय् श्री धन .

जु थकलि श्रुगुरि समय ॥ श्री जुयराजजुया काय । श्री

रत्नसिडन चोया ओ मिनकं मारको परिपात दयकाओ

तया । जुरो । शुभमस्त जगता सिडा ॥

# भिक्षु सुदर्शनयागु सफूत मध्यय् चित्रीधंगु सफूतः

१. लाय्कुली सिद्धार्थ
२. लाय्कुलि पिने सिद्धार्थ
३. सिद्धार्थया बुद्धत्व-प्राप्ति
४. बहुजन हिताय बहुजन सुखाय
५. स्वाँयापुह्ली
६. धात्थेंगु मगल
७. चैत्य-पूजा (भाग १)
८. चैत्य-पूजा (भाग २)
९. आपाढ पुह्ली
१०. पालि त्रिपिटक : छगू परिचय
११. बुद्धकालीन जम्बूद्वीप (भाग १)
१२. बुद्धकालीन जम्बूद्वीप (भाग २)
१३. महाबुद्ध
१४. बुद्ध-धर्मया प्यंगू मूल सिद्धान्त
१५. श्रद्धाञ्जलि
१६. बुद्ध-धर्मया विशेषता
१७. चैत्यपूजा (परिवर्तित संस्करण)
१८. महाबुद्ध (परिवर्तित संस्करण)

---

मुद्रक:- नेपाल सहकारो प्रेस लि, बंवाहाल, काठमाडौं ।